

○京畿江華府黃海道延安府地震○異方坤方有氣如火○
辛亥慶尚道觀察使李清啓本曰固城縣令崔渙救荒諸事
非徒依事目措置常時出入閭巷盡情救飢民皆以父母矜
之至於街路別設賑救之物遇飢輒救往來飢民亦得全
活泗川縣監裴繡光賑恤節目非徒盡情遵行躬審境內
勤謹調濟計其官儲知其所食不足自奉甚薄衙率奴
婢還送本家一以救民為心云傳曰今此崔渙等盡心賑
救活民甚多加資褒賞○御夕講○壬子忠清道觀察使
鄭惟善書狀曰忠州牧使安瑋居官勤儉莅事詳鍊賑恤
之事靡不講究極力措置登時救濟故闔境之民不至餓死云
傳曰至為可嘉加資可也○癸丑御夕講○甲寅受朝祭
○李瀛書啓曰豐基郡守周世鵬常時居官謹慎清儉救荒之
策靡不周密一境之民賴以全活賑濟場就食之人幾至百人
荒政為一道之最善山府使魚水津居官不懈為民興利荒政
亦為詳密境內民物得以全活安東府使金光輟救荒之事勤